

Заманауи білім ордасы

Бүгінгі таңдағы жаһандану кезеңіндегі заман талабы заманауи біліммен сусындаған білікті де, білімді ұрпақтар даярлау болса, Қазақстан Республикасы егеменді мемлекет болғалы осы мақсатқа жету жолында бірқатар іс-шаралар атқаруда. Әл-Фараби атындағы Қазақ ұлттық университетінің 41 мамандығы сапа сараптамасы мен экономикалық, құқықтық және әлеуметтік-гуманитарлық бағытта білім беру бағдарламалары бойынша аккредиттеуден ойдағыдай өтті. Жетекші FIBAA еуропалық аккредиттеу агенттігі халықаралық қатынастар, экономика және бизнес Жоғары мектебі, заң, география және табиғатты пайдалану, философия және саясаттану факультеттерінің білім беру бағдарламаларының сапасын үздік деп танып, жоғары бағалады.

Қазақ ұлттық университеті ТМД университеттері арасында екінші орында тұр. Халықаралық QS рейтингісіндегі әлемнің 800 университеті арасында Қазақ Ұлттық Университетінің 236-орынды иеленуінің өзін мақтанышпен айта аламыз. Әрине, университет бұл жетістіктерге заман ырғағына сай жетілудің аркасында қол жеткізіп отыр.

Әл-Фараби атындағы Қазақ ұлттық университеті әлемнің ең ірі 418 халықаралық жоғары оқу орындарымен ынтымақтастық орната отырып, заманауи халықаралық білім бағдарламаларын жүзеге асыруда.

Бүгінгі таңда әл-Фараби атындағы Қазақ ұлттық университеті алуан түрлі мамандықтарды даярлайтын білім және ғылым ордасы болып табылады. Университет құрамында

14 факультет жұмыс жасайды. Соның ішінде тәуелсіздікпен бірге келген халықаралық қатынастар факультетінің алатын орны ерекше. Факультет жұмысы кәсіби біліктілікпен қоса мәдениеттілікке және тұлғалық қасиеттерді дамытуға бағытталған. Студенттер болашақ мамандығына тек дәріс алу барысында ғана емес, сонымен бірге студенттік клубтар мен үйірмелер жұмысына қатысу арқылы да шыңдалуда. Осы орайда «Жас дипломаттар» зияткерлік клубы мен «Студдипмиссия» ғылыми үйірмесі - студенттердің шешендік шеберліктерін, көшбасшылық қасиеттері мен ұйымдастырушық қабілеттерін дамыту, студенттердің креативті ойлауын, шешендік шеберлігін дамыту мақсатында құрылған болатын. Дәріс кезінде алған білімдерін студенттер пікір-сайыс, дөңгелек үстелдер мен тренингтер кезінде пайдаланады. Клуб шеңберінде ұйымдастырылатын мәдени іс-шаралар жастардың рухани ой-өрісін кеңейтуге бағытталған. Түпкі мақсат – жүріс-тұрыс өлшемдерін жетілдіру арқылы нақтылы тәжірибе барысында, яғни, студентке дербестік беру барысында жауапкершілікті сезіндіре алатын тәжірибелердің негізінде тұлғалық қасиеттерін қалыптастыру.

Сол ретте, әл-Фараби атындағы Қазақ ұлттық университеті жастарды тәрбиелеудің және дамытудың негізгі әлеуметтік мәдени тірегі болып табылады.

А.Р.Әлімбаев

Б.З.Бөжеев

**Әл-Фараби атындағы ҚазҰУ
халықаралық қатынастар
факультетінің доценттері**